

Juni de Freitas:

Tur cantante tabata un ganador

Na festival CBU

Aunke e no a logra cay den premiacion Juni a bisa cu e ta sumamente contento di por a participa na un nivel di tal magnitud. El a bisa cu tabata tin participacion di 9 cantante, pero na final tur tabata mescos cu ruman y cu pa nan no tabata tin un ganador, sino tur tabata merece e premio.

Manera ta conoci Juni de Freitas den fin di siman a participa na e festival di CBU na Curacao. Juni a participa cu e bunita cancion "We are not different than the rest", musica y letra pa Claudius Philips, y aregla pa Franklin Granadillo, kende tambe a biaha hunto cu Juni.

E paisnan cu a participa tabata Trinidad cu 3 cantante, Aruba, 1, Jamaica 1, Curacao 1 y Barbados cu 3 cantante. Surinam y Montserrat pa motibonan desconoci no a participa. Julianne Andros di Trinidad a sali na di promer lugar, A.G. Brown di

Jamaica na segundo lugar y Ruby Fon-Chong tambe di Trinidad na di tercer lugar.

Pero pa e cantantenan mes, Juni a bisa, no tabata tin ganador ya cu durante e 5 dianan cu nan tabata hunto nan a bira mescos cu ruman cu a sa di aprecia balornan di otro.

E festival tabata basa mas tanto ariba cancionnan di gospel y ariba esaki Juni a bisa cu tabata un experiencia masha grandi mes pe, actuando cu cantantenan di nivel internacional. Pe tabata un honor di a representa Aruba, un pais cu asina cu su number ser menciona ya caba ta spera un fuerte participante di e pais ey. Pa Juni esaki tabata algo inolvidable y a habri su caminda artistico.

Juni a haya invitacion pa participa na e festival di Curifest y tambe el a haya invitacion personalmente di parti di sr. Peter Ashbourne di Jamaica, cu ta un



areglista hopi aclama y tabata aregla cancionnan pa Bob Marley, pa haci un grabacion ariba su proximo lp cu e lo bay lanza

ariba mercado. Juni a bisa cu e festival pe ta algo inolvidable y cu e sa di probecha di dje.

"Franklin Granadillo tambe a haci un tremendo presentacion na Curacao," Juni a sigui bisa. "Franklin hunto cu sr. Ashbourne tabata e personanan mas aclama y mi tin di bisa cu

tabata pami un honor di por a biaha cu Franklin. Ora cu number di Aruba so worde menciona, ya caba ta sinti cu eynan tin un participante fuerte ya cu Aruba ta conoci pa su cantantenan di nivel internacional".

Pa e Festival di dia 13 di November venidero "Aruba's Big Song Festival" Juni a bisa cu e lo bay cu un cancion hopi fuerte. "E cancion 'Gracias te doy' mi mes a composite y

Sigui lesa pag.12

-DIARIO. (DIAMARS 25 OKTOBER 1988), P. 7

Tur cantante *Cont pag.7*

aregle y e ta sali for di mi curazon pa mi dedique na mi yiu y tambe na tur mayornan cu ta sinti nan mes orguyoso di por trece un ser na mundo. Mi tin sigur cu ora e publico tende mi cancion, e lo conmove nan hopi mes".

E Festival Aruba's Big Song Festival lo ta na Spaño, Ingles y Papiamentu. Esnan cu gana cu nan cancion na e idioma Spaño lo por participa na Viña del

Mar, OTI, y Festival de la Cancion na Puerto Rico. Esnan cu competi na Ingles por participa na Japon y CBU y esnan cu competi cu nan cancion na Papiamentu lo por bay representa Aruba na Colombia den un festival cultural cu lo bay tuma lugar ayanan.

Na final di e entrevista Juni a bisa cu e tin un comentario chinito. Su deseo ta pa e por participa cu artistanan grandi di

antes, manera entre otro Eddy Toppenberg, Jossy Brokke, Sharon Rose, etc. "Pa mi competi cu cantantenan asina, bo ta experiencia hopi mas, bo ta siña hopi mas y bo ta sinti cu bo ta competi. Mi no kier exclui ningun cantante, ya cu mester bisa cu tin cantantenan fuerte pero compitiendo cu e grandinan di antes, ta un orguyo pa esnan di awor cu ta buscando e caminda profesional, y cu esnan di ayera sigur lo kier duna un man".